

Minister di Turismo, Transporte y Labor, Sr. Otmar Oduber

Sosten na e proyecto pa conserva Bubali Plas lo wordo duna

ORANJESTAD – Bubali Plas ta un tesoro di naturaleza cu mester wordo proteha, preserva, y conserva. E ta wordo reconoci internacionalmente como un area importante pa parhanan den migracion, y un area di “breeding”. Pa nos mantene y mehora esey mester cuminsa mehora e area mes. E intencion ta pa aumenta e zonanan pa “breeding” y mehora e circulacion di awa y regula e actividadnan den e area. Tambe por prepara e area pa nos comunidad y nos bishitantenan por gosa di e pida naturaleza aki den harmonia cu e parhanan. Por haci cambionan minimal cu un obhetivo educacional y recreativo.

“Birdwatching” ta un niche importante y ta creciendo y por wordo agrega na e portafolio di atraccion turistico. E niche aki ta consisti di amantenan di naturaleza cu ta biaha pa gosa di un encuentro di cerca cu parhanan rond mundo. Ta bale la pena pa conserva Bubali Plas, pa nos por gosa di naturaleza y alabes ofrece esaki como un atraccion special. Esaki ta opinion di Minister di Turismo, Transporte y Labor, Otmar Oduber.

Tony Cox, fundado di Tera Aruba Foundation a comenta cu meta principal di e proyecto aki ta pa yama atencion di publico, estudiante, hende local y turista, pa bin bishita

Tera Park y conoce mas di Bubali Plas Conservation. Tambe mester wak e iniciativa aki como uno pa conserva nos herencia cultural; por medio di un convenio entre Tera Aruba Foundation, Aruba Bird Life Conservation y Parke Nacional Arikok mester logra pa crea un status di parke nacional pa Bubali Plas Conservation/ Tera Park.

Sr. Greg Peterson di su banda a duna di conoce despues di a conversa cu Minister Oduber cu nan a keda sumamente contento cu e bon reaccion di Minister Oduber. “Nos sa cu Minister ta un persona cu ora e dicidi pa algo e ta bay pe, manera e mes a indica den nos meeting di haya e idea aki interesante. Mas aun si Minister bisa e ta bay pa algo e ta bay

pe, y nos mester wak con nos por keep up cu minister awor.” Minister Oduber a menciona cu proyectonan cu ta agrega na e calidad di bida di nos mesun comunidad mester wordo aplaudi. Si ademas di esey e ta sirbi como un producto cu nos bishitantenan por disfruta di dje, esey ta miho ainda. Nos clima, beach y lama ta keda nos atraccionnan principal, hunto cu siguridad, hospitalidad, y bon servicio. Pero desaroyonan mundial riba tereno di sostenibilidad, interes den proteccion di naturaleza, enfasis riba experiencianan autentico, ta birando mas y mas importante. Bishitantenan ta aprecia un pais aun mas na momento cu e comunidad ta muestra practicanan di preservacion y conservacion

di nos naturaleza. E proyecto “Tera Park” por yena un vacio y agrega na un diversidad di experiencia, cumpliendo cu principianan di sostenibilidad. E proyecto ta consisti di un hardin botanico, un programa interactivo di e flora di Aruba y centronan di observacion di parhanan. Na e mesun momento e ta fungi como un centro educacional pa nos mesun poblacion. Lo ta precioso si nos por logra amplia e area di “Parke Nacional” cu proyectonan manera Bubali Plas y Tera Park. E proyecto aki lo haya sosten financiero di Tourism Product Enhancement Fund mirando cu ta trata aki di proteccion y mehoracion di un atraccion special y cu ta contribui tambe na mehoracion di Producto Aruba. □